

Uunga siunnersuut: Aalisarneq pillugu Inatsisartut inatsisaata allanngortinnera pillugu Inatsisartut inatsisaat nr. xx, xx.xx 2014-imeersoq

(Inuussutissarsiutigalugu aalisarsinnaanermut akuersissutit tunniunneqartarnerat ingerlaannartarnerallu pillugit allannguutit)

Saqqummiussissut

(Aalisarnermut, Piniarnermut Nunalerinermullu Naalakkersuisoq)

Siullermeerneqarnera

Naalakkersuisut sinnerlugit matumuuna aalisarneq pillugu inatsisartut inatsisaata allanngortinneqarnissaanut siunnersuut saqqummiutissavara.

Naalakkersuisut siunnersuut manna saqqummiuppaat aalisariutit pisaqarsinnaassusiata – minnerunngitsumik sinerissamut qanittumi qaleralinniarnermi – nunatsinni massakkorpiaq aalisarsinnaanermut periarfissanut naleqqussartariaqarnera eqqarsaatigalugu.

Erseqqinnerusumik oqaatigalugu siunnersuutikkut siunertarinearpoq aalisarneq pillugu inatsimmi atuuttumi § 10-p allanngortinneqarnissaa aalisarnikkut pisuussutitta iluaqutiginiarneqarnerisa pissusissamisoornerumik pissarsiviunerusumillu aqunneqarnissaa siunertaralugu.

Aalisarneq pillugu inatsimmi § 10 atuuttoq 1996-imili aalisarneq pillugu inatsit atuutillermalli atuussimavoq, ilisimaneqarluarlunilu tamatuma kingorna nunatsinni aalisarnermik inuussutissarsiuteqarneq annertuumik ineriartorfiusimasoq. Taamatuttaaq ilisimaneqarluarpoq aalisarnermi unammilligassat ukiut ingerlanerini aamma ikiliartorsimanngimmata. Tamanna tunngavigalugu inatsimmi erseqqissaasoqarnissaa Naalakkersuisut pisariaqartippaat, aalajangersakkap aalisarnermi ajornartorsiutinut aalajangersimasunut naleqqussarneqarnissaa siunertaralugu.

Tamatumunnga atatillugu ilisimatitsissutigisinnaavara Naalakkersuisut minnerunngitsumik sinerissamut qanittumi qaleralinniarnermi ajornartorsiutit eqqumaffigimmatigit, aalisagaqassutsip killeqarnera aalisarnerullu aningaasaqarniarnikkut imminut napatissinnaanissaanik pisariaqartitsineq annertuunik unammilligassaqaqarfiullutik. Unammilligassat taakku iliuuseqarfiginissaat pisariaqarluinnalivissimavoq, inunnit inuussutissarsiutinut allaneersunit qalerallit akigissaarnerat tunngavigalugu isertitaminnut tapertatut qaleralinniarnianit soqutiginninnerup annertusiartornerata malitsigisaanik.

Unammilligassat taakku kinguneqarluartumik iliuuseqarfigisinnaajumallugit taamaalilluni pisariaqarpoq inuussutissarsiutigalugu aalisartut ataasiakkaat ataasiakkaarlugit killilersorinnaanissaanut inatsisitigit tunngavissiiinissaq, taamaaliornikkut inuussutissarsiortunit allanit sinerissamut qanittumi qaleralinniarnermut peqataaniartut mattunneqarsinnaaniassammata.

Tamatuma anguniarnerani taamaattumik pisariaqarpoq aalisarneq pillugu inatsimmi § 10-p atuuttup allannortinneqarnissaa, paasinarsisimammatt aalisarneq pillugu inatsimmi atuuttumi § 10, aalisarnermik tamanut tunngasunik arlalinnik killersuisinnaatitsisoq, unammilligassanut taakkununga atatillugu naammangitsoq.

Aalajangersakkamik taassuminnga allannortitsinerup taamatuttaaq akuersissutinik tunniussisarnermut tunngatillugu Naalakkersuisut iliuuseqarsinnaanermut periarfissaat pitsaanerulersissavaat, tassami suliassami aalajangersimasumi Ombudsmandip apeqqusermagu § 10 aamma § 10a-mi atuuttumi pisariaqartumik inatsisitigut tunngavissaqarnerseq inuussutissarsiutigalugu aalisarnermut akuersissutinik tunniussisarnermut atatillugu Naalakkersuisut assigiinngitsunik piunasaqaateqarsinnaanerannut.

Taamaalilluni inatsisissatut siunnersuutikkut naatsorsuutigineqarpoq Naalakkersuisut periarfissagissaarnerulissasut ajornartorsiutinik aalajangersimasunik, minnerunngitsumik sinerissamut qanittumi qaleralinniarnermi, iluarsisinnaanissaminnut, akuersissutinik tunniussisarneq eqqarsaatigalugu Naalakkersuisut iliuuseqarnissaminnut periarfissaat nukittorsarneqassasut, peqatigitillugulu naatsorsuutigineqarluni inatsisissatut siunnersuut qaleralinniarnermi isertitaqarniarnermut pitsaasumik sunniuteqarumaartoq.

Taamatut naatsumik oqaaseqarlunga, allannguutissatut siunnersuut Inatsisartunut oqaluuserisassanngortippara.